

Քահանայապետն զկոմսեն եւ զասպետացն կուսակցաց նորին: Արդ գրէ Իննովկենտիոս առ թագաւորս մեր, խիթալով եթէ Անտիոք առիթն վիճի ընդ երկոսին՝ գուցէ առաւելագոյն եւս չարի լիցի նոցա, ՚ի Սառակինոսաց յափշտակելով, եւ անբաւ վնասու քրիստոնէից. «Դու, ասէ նաեւ թղթովք նորընտիր արքեպիսկոպոսին Տարսոնի եւ Տեստոնեան ասպետաց՝ յամենայնի ճգնիս արդար զքեզ եւ իրաւ ցուցանել. բայց ոչ ամենեւին նոյնպէս դատին եկեղեցական եւ քաղաքական օրէնք. զի ցորչափ կոմսն ՚ի ձեռին ունի գտերութիւն քաղաքին՝ ոչ է իրաւացի առանց դատաստանի մերժել զնա. եւ ոչ քեզ օրէն է միանգամայն ե՛ւ զինուք ե՛ւ օրինօք պայքարիլ¹⁷⁵. եւ զայս ոչ վճռաբար ասեմ քեզ, որդեակ ամենասիրելի, այլ յետ լսելոյ զբազմաց վճիռ. այն զի եւ զանգատի կոմսն՝ եթէ ընդէ՞ր ոչ բանադրի Լեւոն՝ անդադար մարտ մղելով, մինչ ինքն պատրաստ է անսալ դատի եւ վճռոյ արդարութեան: Իսկ ինքն պատշաճ դատի յորդորել զկոմսն՝ զի յանձնեցէ զբերդն ՚ի ձեռս պատրիարքին Պետրոսի, որ այր զգօն է, արդարակորով եւ անաչառ, եւ ասպետքն Հիւրականք եւ Տաճարականք պահ ունիցին, եւ ռոճիկ տացի նոցա յերկոցուն եւս կողմանց. եւ մինչեւ ՚ի զլուխ ելանել դատաստանին՝ հարկ է եւ քեզ զինադուլ առնել. այլ եւ առ ՚ի լռեցուցանել զհակառակութիւն Տաճարականաց՝ տալ նոցա զԿաստոն բերդ, զոր վաղագոյն առ Աղեքսանդրի Քահանայապետաւ¹⁷⁶ կալեալ ունեին. եւ մինչեւ թէ ոչ ունիցին զայն վերստին՝ սպառնան թողուլ լքանել զամենայն եւ ՚ի բաց ելանել ՚ի Սուրբ երկրէն, որում կարեն մեծապէս օգտել: Գանգատիս, զի մարտնչին ընդ քեզ. եւ դու զնոյն գործես. զի բռնութիւն՝ բռնութեամբ վանի.– պաշտպանեն զԱնտիոք, քանզի ՚ի սահմանս նորին են կալուածք իւրեանց. այն զի այլ ինչ է մարտնչել ՚ի պաշտպանութիւն եւ ա՛յլ ՚ի վնասողութիւն¹⁷⁷: Եւ մի՛ կարծիցես եթէ զայսոսիկ թելադրիցեմ քեզ առ շնորհուկս ինչ կոմսին՝ որ անիրաւութեամբն առ հայր իւր՝ պատրիարքն՝

¹⁷⁵ Simul non sit et armis et legibus contendendum.

¹⁷⁶ Աղեքսանդր Գ, եկաց յառաքելական աթոռն՝ յամս 1159-1181:

¹⁷⁷ «Longe aliud sit difendere quam offendere, ac repugnare sit quam impugnare diversam».– Լեւոն վասն հակառակութեան նոցա ընդ ինքն զանգատէր, բայց եւ ուխտ եկեղեցւոյն Անտիոքայ բողոքէր առ Քահանայապետն վասն անբարի գործոց ասպետաց եւ ամբարտաւանութեան նոցին, որք ժպրիէին անգամ ասել, եթէ արժան է բանալ ինքեանց զքաղաքս եւ զեկեղեցիս՝ թէպէտ եւ բանադրանօք փակեալք իցեն: (Հուրդէր, Բ, 359 իտալերէն թարգմանութեանն):